

Lago ta regala edificio na Imelda Hof

E muchanan di Imelda Hof no tin mester di usa un klas preta mas pa siña obra di man. Respondiendo na un peticion di e Soernan di Bethania cu ta maneha Imelda Hof, e compania, na October 1958, a regala nan e oficina anterior di Acid & Edeleanu Plant cu a wordo re-emplasa pa uno nobo di concreto.

E ex-oficina traha di palo a wordo corta den dos y transporta riba un truck (flatbed) pa e sitio na Noord. Despues cu el a wordo poni bek den otro pa contratistanan local, el a wordo usa pa e Soernan pa nan programa di obra di man.

E trabou di transportacion cual tabata rekeri ayudo di Riggers for di Mechanical Yard y un combinacion di tracker-trailer cu normalmente ta wordo usa pa lastra aparatonan pisa, a tuma dos dia. E edificio mester a wordo hiba den dos parti pa motibo di su peso y altura. E prome pida, pisando mas o menos 24 ton a wordo hiba dia 30 di september 1958 y e di dos e siguiente dia. Cada biaha a tuma seis ora y mei. Pa compania e Riggernan y e truck, a bay electricista, linemen di telefon y polis di gobierno. Wayanan di coriente y telefon den laira a wordo movi y hisa pa traha luga pa e truck cu su carga di 18 pia halto pasa cu tur seguridad. Polisnan tabata regla e trafico pa e caravana.

E edificio a sirbi como oficina di Acid & Edeleanu Plant for di Januari 1930 te ora cu esun nobo a bin cla na september 1958. Dia a traha e oficina di palo aki e tabata un tercera parti di loke e tabata dia a move pa Imelda Hof. Na 1934 e edificio a wordo haci dos bes mas grandi y dos aña despues a pone un fundeshi di concreto. E cambionan aki tabata debi na e aumento di empleadonan den e oficina. Aki, na aña 1958, ta unda mi a traha na dos oficina, na oficina di L.O.F. y aki na e oficina nobo. Pa move for di un oficina pa otro, mi mester a pasa rijbewijs pa core scooter. Si nos ta coda e oficina aki tabaa keda net pazuid di Postkantoor na San Nicolas y tambe un porta (gate) cu su parkeplaats pa esnan cu tabata traha na e parti west di e refineria. Despues gobierno a tuma over e parti aki y awo nos tin un stacion di Arubus.

E edificio nobo di Imelda Hof pa obra di man tabata bou di supervision di e Soernan di Bethania y pa tur e muchanan muhe hoben. El a wordo cambia den un localidad grandi pa acomoda tal obranan manera trahamento di modelo cu klei, cortamento di cuero, pintamento y lo demas. Ademas di drecha e interior, contratistanan local tambe a bolbe uni e dos seccionnan di e edificio y haci'e manera e tabata originalmente y pone riba su fundeshi nobo.

Rosalie Teagle Hall:

Pa yuda damanan hoben prepara pa mañan. Mannan chikito instabil ta crece den mannan fuerte y firme na e centro nobo di obra di man pa muchanan muhe na Imelda Hof. E centro cu ta carga nomber di Rosalie Teagle Hall segun Sra. Teagle cu ta un benefactora di e luga, a wordo haci un luga completo di trabou. E edificio cu tin forma di un "L" ta duna Soernan di Bethania e facilidadnan pa siña muchanan muhe hoben tal ofishinan util manera pintura di textiel, bordamento, kimamento den palo, cosemento, trahamento di macuto, articulonan di cuero y ceramico. E soernan cu tin encargo di Imelda Hof ta kere cu e sabidurianan aki lo haci e muchanan muhe miho amanan di cas y miho cuidadano ora nan laga e institucion pa sigui cu nan bida.

Imelda Hof ta un di cuatro puebleciconan hubenil na mundo cu ta wordo traha na Noord pa muchanan negligisha y menos privilegia pa medio di subsidio parcial door di e gobierno insular di Aruba. Den cada un di e casnan aki ta biba 15 mucha, un soeur cu ta actua como ama di cas y un cu ta su ayudante. Anto un ambiente mas o menos di un cas di berdad ta wordo realisa pa e muchanan.

Pa varios aña e muchanan di e pueblecito tabata usa e scol preta pa siña obra di man y pa practica loke nan a siña. Un gesto door di Lago na October 1958 a hinca bida nobo den e programa di obra di man di Imelda Hof. Esaki tabata ora cu Lago a duna y hiba e ex-oficina di Acid & Edeleanu Plant. Un edificio cu durante 26 aña a sirbi como oficina di e planta aki, un planta cu a bin acerca pa asina Lago por a produci sweetened gasoline, esta gasolin cu menos azufre aden. Esaki a evita cu e gasolin mester a wordo trata na su destino enbes di aki na Lago mes.

E soernan di Bethania a remodela e edificio despues cu trahadonan boluntario a pega e dos seccionnan y a pone un fundeshi nobo. Awo e ta dos cuarto grandi unda e muchanan muhe ta traha yen di energia. Den un di nan tin mashinnan di cose unda e bishitante por mira un soeur cu hopi pasenshi ta mustra e muchanan e usonan di un mashin di cose. Den un otro skina tin un grupo di mucha muhe cu ta pasa nan tempo cu combersacion alegre mientras nan ta borda lenso of slopi di cushinchi. Na otro banda di e gang, den profundo concentracion, tin un mucha muhe ta stencil diseño complica riba paña mientras un amiga ta pinta decoracion bunita riba un calbas. Un exhibicion special ta recoge bista di e bishitante. Aki tin figuranan artistico traha di concha y pluma, imagen di klei, capa di palo pa foto album cu diseño kima aden, lenso y slopi borda cu diseño di Aruba, colorido schaalteje di palo, bunita paña di bisti y macuto fini. E edificio a trece e sabiduria y animacion.

Imelda Hof a wordo yama segun Overate Imelda, of Moeder Imelda, kende durante ultimo 30 aña tabata e superior di e Orden. E Orden tin 500 soeur cu ta percura pa mas cu 1000 mucha muhe den henter mundo. Binti soeur ta biba den e convento nobo y cuatro cas pa sirbi e 60 muchanan. Na Imelda Hof, muchanan homber te na edad di

siete aña y muchanan muhe te na edad cu nan ta wordo husga capas pa contribui na sociedad ta wordo duna refugio, cuidu y consuelo.

Pa usa plenamente e Rosalie Teagle Hall pa siña e muchanan muhe hoben obranan di man valioso y pa duna nan confiansa cu uso di nan man, e soernan ta spera di duna nan un miho oportunidad pa adapta nan mes na bida.

Bendicionamento di e convento nobo di soernan di Bethania na Imelda Hof pa Obispo M. J. Holterman, Obispo di Willemstad, a tuma luga traimerdia dia 17 di november 1958. Construi e aña aki na un costo di Fls.300,000.00, e structura ta e cas nobo di 20 soeur dedica na e programa hubenil di Imelda Hof. Mas o menos cuarenta invitado tabata presente na e ceremonia.

Moeder Imelda y Magdalena cu ta vicaria general, a bin Aruba na 1951 y e construccion di e casnan pa muchanan a cuminsa e siguiente aña. Cada cas ta contene 15 mucha, un soeur cu ta actua como "mama di cas" y un soeur cu ta ayudante. Cada edificio tin su mesun cushina y comedor. Nan a wordo traha na un costo di Fls.200,000.00 cual a wordo yuda cu parti door di gobierno insular di Aruba. E convento nobo a wordo traha for di fondo di e congregacion mes, asistencia di Lago y for di un fianza for di gobierno insular.

Ademas di e ayudo continuo di gobierno insular, e Orden a ricibo ayudo for di Lago y Lions Club. Lago a regala un edificio pa ser usa pa traha obranan di man. E soernan a yamel'e "Rosalie Teagle" cu gratitud pa e asistencia duna door di B. Teagle, gerente di Relacion Publico di Lago, y Sra. Teagle. Lions Club a duna mashin di cose pa enseñansa di trabounan di cas y Lions tur aña ta yuda cu Sinterklaas.

Basicamente un soeur di e pueblo hubenil di Bethania na Imelda Hof ta provee un ambiente propio pa e muchanan nan bida domestico a debilita nan door di morto di nan mayor of negligencia na cas.

E soernan di Bethania a establece e tres reglanan aki pa bolbe construi e bida di hubentud meritorio: 1. Percura pa muchanan cu ta biba di casnan kibra den un pueblo hubenil manera Imelda Hof. 2. Rehabilita delincuentenan femenino cu ta den prison of reformatorio (na Europa solamente). 3. Rehabilitacion interno, cual ta un proyecto unico segun cual un mucha muhe delincuente door di soernan den nan mes circulo y despues di un periodo di prueba, tambe por bira un soeur. Un maximo di un tercer parti di e soernan por consisti di e muchanan muhe rehabilita. E identidad di e grupo aki ta wordo teni secreto dentro di e consecracion. Ningun hende sa cua di e soernan a wordo rehabilita.

E orden di Soernan Bethania a wordo funda na aña 1867 door di Reverendo Jozef Lataste di Orden di Dominicanonan. El a haya e idea mientras e tabata predica na muhenan den un prison na Sur di Francia unda el a descubri cu hopi bon calidadnan tabata scondi dentro di e muhenan.

Dufi Kock
Janauri 9, 2018